

Zwiegespräch Optimist / Pessimist 2019

- P Ohjerom, ohjerom dia Fasnet hot a Loch
 ond hot koi bissle Geld em Sack
 zom a Päckle Schnupftaback
 ohjerom, ohjerom dia Fasnet hot a Loch
- O Oh mein Freund was isch den los
 was machsch denn für a Gsicht na blos
- P Ha hosch denn du des net kapiert
 was do grad eba isch passiert
- O Ha doch dia Narra hen grad eba
 für des Johr ihren Abschied geba
- P Des isch was mi so traurig macht
 a Schand dass dei Gsicht weiterlacht
- O Mein Pessimist, ja Menschenskind
 es gibt koi Fasnet ohne End
 des isch no lang koin Grund zom Schreia
 ma ka sich jo scho uf die nächst Fasnet freia
- P Des isch bei mir no net so klar
 wenn i dra denk was des Johr wieder alles war
 zom Breaglerstammtisch glei em neua Jahr
 trifft sich en der Grotte die ganze Breagler-Schar
 do wird viel tronka ond verzellt
 weil jeder seine Gschichtle do vorstellt
 au dr Pessi ond dr Opti, diese zwei
 send wie emmer mit dabei
 am hendra Tisch isch gmiadlich ond isch eng
 ond später drückt die Blase dann a wenig
- O Wenss einen Breagler, der wo henda hockt, duat drucka
 no fangt dr ganze Tisch noch vorna a zom rucka
 au onser Anne ruckt mit einem Satz
 vo ihrem uff dr nächste Platz
 ein Schrei ertönt vo diesem Sitze
 weil vo onda durch des Polster dringt a Schraubaspitze
 seit diesem Pieks am Arsch, ganz ohne Flax
 nennt ma sie: die Prinzessin auf der Spax
 vo ons an Rot: isch's Polschter etwas zemmaghocket
 isch besser wenn ma net so omanaderbocket

- P Au dr Hexavater Schnecki hot's net leicht
wenn er vo einem Pflichttermin zom andra keucht
am sechsta Januar do gohts scho los
do isch dr Feschtlles-Stress scho riesagroß
er muss mit jedem eins zwei trenka
lässt quasi laufend sich eischenka
ond weil Bier ond Wein ihm so gut schmeckt
hot ihn dr Alkohol daniedergstreckt
ma hot ihn hoimbrocht, s'isch vermessa
weil Kittel ond Schlüsselbund hot er glatt vergessa
- O En Aixheim beim Brauchtumsabend
war's fürn Schecki wieder erquickend und labend
au dort isch's Bierle super gloffa
ond zur Busrückfahrt war er dann sturzbesoffa
sei Kopfllosigkeit isch eigentlich net zu fassa
hot er doch glatt sei Hexavatermaske liega lassa
dr Musikverei hot se mit, wo er se hot gseha
dene müsst ma no a Fässle Bier ausgea
dir lieber Schnecki sott ma a Ochsa-Kette schenka
no kasch alles was wichtig isch dir om dr Hals romhenga
- P Aber bei de Hexa isch jo no meh passiert
des isch scho fascht zom heula, oscheniert
en Aixheim am Omzug waret mir an zwanzigster Stell
des ging so ra Jonghex oifach gar net zu schnell
viel z'früh stand se em Startloch, im Nacka dr Schalk
er hot richtig gschärret, dr Kitzlingers Falk
- O Vom Bier scho leicht benebelt er war
do sieht er vorbeimarschiera die schwarzrote Schar
des send meine Hexa, des müsset se sei
ond reiht sich eilig bei dene ei
ohne dass er des gmerkt hot, des macht ons betroffa
isch der dr halb Omzug bei de Aldinger Hexa mitglofffa
- P Es goht grad so weiter bei dera Hexerei
en Buchaberg beim Hexaball war oiner s'erscht mol drbei
raus aus am Bus ond en die Halle nei
Eimarsch dr Sulzer Hexa des muss sei
doch glei drnoch hot sich dr Ützwurscht verdünnisiert
isch schnurstrax zrück zom Bus maschiert
er schloft auf dr Rückbank ond scharcht dass es zischt
warscheinlich hot der bei Vorglüha oin zviel verwischt

- O Nachts om zwölfe wacht er wieder uff
 goht zrück en'd Halle ond isch guat druff
 a halbe Stond später isch scho wieder Schluss
 alle Hexa fahret hoim mit am Bus
 böse Zunga behauptet er sei jo blos mit
 dass alle Hexa fahret pünktlich zrück
 i sag: für fünf Euro Busbündel, Rausch ausschlofa mit dabei
 em Esch seim fahrenda Hotel, isch echt a Schnäppchen gsai
- P Beim Omzug en Bildechinga waret au dabei
 die Zwilling von da Schillerhöh, die ganz Gscheite zwei
 noch am Omzug goht ma ens Zelt des isch jo klar
 doch die zwoi send direkt en d'Bar
 es kam die Zeit wo ma wieder ganga muss
 und zwar dringend zrück zom Bus
 beim nausganga bemerkt da Axel dass er no was hot
 a Abstreichkärtle ganz voll, des tausch i no om ganz flott
 wie jeder woiß hen die Zwilling an gewissa Geiz
 die zwanig Euro holt er sich ond dobei bleibts
 Jogger heb mol mei Besa, i komm glei wieder
 dem wär statt warta, zom Bus laufa lieber
 der Axel kommt nemme, mit Warta isch jetzt Schluss
 dr Jogger lauft eilig zua, doch weg war dr Bus
- O Er ruaft seim Bruder a, wo er denn blos sei
 i hock em Bus, wieso bisch du do net drbei
 dr Jogger stand do, war tief getroffa
 wer fährt mi jetzt hoim, alle Bekannte send bsoffa
 oi Hoffnung die hot er no
 er ruft sei Frau a, doch die goht net ans Telefo
 jetzt nimm i halt a Taxi, des send fai Quala
 dahoam akomma musst er fufzig Euro zahle
 am nächsta Dag ruft er em Axel a wega seine Spesa
 du i will meine 50 Euro, no griegsch do dein Besa
 der lacht ens Telefo ond lässt ihn nomal leida
 den kasch du bhalt, i han no an zweita
- P Wenn mr grad bei de Heindels send
 do moin i, isch da Jogger manchmol wie a Kend
 morgens früh send se no beim Timo gsesa
 ond hend beim Bier trenka die Zeit vergessa
 da Timo hat a Sprachbox die hoist Alexa
 Alexa spiel a Musik, no könnet mir reläxa
 da Jogger erstaund zom Timo: ka i des au
 musch halt mitra schwätza, die isch nämlich schlau

- O Alexa, schrie da Jogger en die Box do nei
 es kam nix zrück, des ka doch net sei
 da Jogger nochmol "Alexa" und wieder kam nix
 des isch doch an Scheiß, so a blede Bix
 lieber Jogger, du moinsch du bist emmer so gscheid
 aber bis zur Alexa hosch du's no ziemlich weit
 fehlt dir vielleicht die Erfahrung em Leba
 d'Alexa brauch klare Befehle, wie jedes Weib eba
- P Em Haus vom Zunftmeister isch au emmer was los
 vor am Breaglerabend sucht dr Thomas sei Breaglerhos
 alles do: Kittel, Weste, Mask ond's Buach
 blos noch dr Hos isch er wie narret uff dr Suach
 er sucht's ganz Haus ab und hot dann den Verdacht
 Weib hosch du aus dera Hos a bar Butzlomba gmacht
 er ruaft Sohn Benschi a, sein Hals isch scho gschwolla
 he isch die Hos en deem Saustall verscholla
 ond om an drohenda Familiakrieg noch abzuwenda
 duat dr Benschi mit nochdenka koi Zeit verschwenda
 ond spontan fällt's ihm sofort wieder ei
 Vaters ond sein Breagler send doch en dr Reinigung gsai
- O Letscht Jahr glei noch dr Fasnacht
 hot er se höchstpersönlich dort no nagebracht
 zwei Wocha später selbst an die Abholung denkt
 ond hot alles sche verpackt en Vater's Schrank neighängt
 aber waret des oine oder zwei Hosa tut er sich fraga
 beim besta Willa gönnt er des nemme saga
 er fährt en'd Reinigung am Breagler-Samsdich-Morga
 ond frogt dort eilig noch dera Hos voller Sorga
 die Frau grinst ond zeigt hendanom
 freilich die hängt scho a dreiviertel Jahr bei mir rom
 worom er koi Nachricht griagt hot, wollt dr Benschi no wissa
 die wird scho äbber hola, wenn er se an dr Fasnet duat vermissa
- P Geburtstage send zom Feira da
 des war au beim Siegfried Baumann klar
 schließlich war es jo sein Achzigschter
 des feiert ma net kloie sondern mächtiger
 glada waret viele Gäschte
 Vereine, Freunde, blos die Beste
 au mit drbei war onser Kapelle der Narra
 ebafalls die Achzehner mit vollem Karra
 em Bergfelder Lindasaal hot gfeiert dr Jubilar
 die zwei Kapella mit ihrem Auftritt waret dr Star

- O Henderher wird wieder an Platz nagsessa
 blös die Achzehner hen des vergessa
 die haltet sich en da Wirtschaft am Stammtisch uff
 od mache dort tierisch oin druff
 vo da Narrenkapell kamet a paar an sella Tisch
 ond hend gmoind, dass des ned grad höflich isch
 feira dean dia Gäscht älle em Saal do dreina
 do werdet ihr Achzehner wohl au drzua nahocka kenna
 die hend sich natürlich köschtlich amüssiert
 weil d'Narrekapell als Astandswauwau hot reagiert
 ond weil die au no ihre gelbe Pullover traga hend
 werdet dia jetzt die Gelbwesta vo dr Narrazunft gnennt

- P Oi Info könnet mir euch no geba
 em Fundbüro wurde an Sulzer Hexabesa abgeba
 der wurd vo ra Hex em Suff verlora, net gstohla
 falls sich einer no dra erinnert, könnt ma den hola
 also s'Fega ond s'Fliega noch voll funktioniert
 die Hexa vom Fundamt hend's extra ausprobiert

- O Ja so Flugstonda send doch schene Sacha
 dodrüber kann ich halt herzlich Lacha

- P Jo dai Gsicht des duat blös lacha
 derweil send des fai ernschte Sacha

- O Oh sei doch froh, dass i no lacha ka
 ond hör zum Schluß mein Wahlspruch a
 wenn Sorge drückt wenn Not und Pein
 dich zwingt ein Pessimist zu sein
 schau auf tu es dem Optimisten gleich
 ein fröhlich hoffnungsvoller Blick
 den Weg zum Licht zur Sonne weist

Narri- Narro

5.3.2019 Sigge & Hacky